

आकाशवाणी

1. पच्छिम बंगाल विधान सभा चुनाव च 206 सीटें कन्नै शानदार जित हासल करियै BJP नै इतिहास रची दिता ऐ। 15 बरे धोड़ी सत्ता च रेही दी तृणमूल कांग्रेस गी छड़ियां 80 सीटां थोड़ियां।
2. असम च बी.जे.पी. दे नेतृत्व आहले NDA नै उप्परोतली त्रीस बारी सत्ता हासल करियै- इतिहास कायम कीता- तमिलनाडू च पैहली बारी चुनाव लड़ने आहली TVK नै रिकार्ड जित दर्ज कराई।
3. प्रधानमंत्री नरेन्द्र मोदी होरें BJP दी जित गी एतिहासिक करार दिंदे होई- पच्छिम बंगाल- असम- पुदुचेरी- तमिलनाडू ते केरलम दे लोकें ते पार्टी कार्यकर्ताएं दा आभार प्रगट कीता ऐ।
4. ईरान दे ड्रोन हमले मगरा फुजैराह तेल उद्योग च अग्ग लग्गने दी घटना च त्रै भारतीय जखमी।
5. ते IPL च कल मुम्बई इंडियन्स नै लखनऊ सुपर जायंट्स गी 6 विकेटें कन्नै रहाया- अज्ज दिल्ली कैपिटल्स दा मकाबला चेन्नेई सुपर किंग्स कन्नै होग।

<><><><><><>

Assembly Polls –WB/T.N

पच्छिम बंगाल ते तमिलनाडू विधानसभा चुनाव च दंडू मोर्चे पर इतिहास रचेया गया ऐ। पच्छिम बंगाल च बी.जे.पी गी पैहली बारी भारी समर्थन थोआ ऐ- जिसलै जे तमिलनाडू च नमी पार्टी तमिलगा वेत्ती कज़गम TVK सब्भनै शा बड्डी पार्टी बनियै

सामने आई ऐ। तोंआई होरनें विधानसभा चुनाएं च असम ते पुदुचेरी च पैहली आहली सरकारै गी गै लोकें दा समर्थन थोआ ऐ- जिसलै कि केरलम च नमीं सरकार चुनी गई ऐ। पच्छिम बंगाल च बी.जे.पी. नै 206 सीटां जितियै विधानसभा च लोड़चदे दंऊ तिहाई कोला मता बहुमत हासल कीता ऐ ते उत्थे 15 बरे धोड़ी सत्ता च रेही दी तृणमूल कांग्रेस दा राज खत्म करी दिता ऐ। तृणमूल कांग्रेस गी छड़िएं 80 सीटें कन्नै गै संदोख करना पेया ऐ। घोषत नतीजें च बी.जे.पी गी 206 टी.एम.सी. गी 80 कांग्रेस ते AJUP गी दंऊ-दंऊ ते CPI (M) गी इक सीट पर जित हासल होई ऐ। मुख्यमंत्री ममता बैनर्जी भवानीपुर सीट पर बी.जे.पी. दे शुभेन्दू अधिकारी कोला 15 जहार कोला मते वोटें सवां हारी गेइयां न।

<><><><><><>

Assam –BJP Win

असम च सत्ताधारी बी.जे.पी दे नेतृत्व आहले NDA नै इतिहास रचदे होई उपरोतली त्रीऽ बारी सत्ता च औने दी पक्की तयारी करी लैती। 126 मिम्बरें आहली असम विधानसभा च बहुमत लेई 64 सीटें दी लोड़ हुंदी ऐ जिसले के BJP नै 82 ते ओहदे सहयोगी असम गण परिषद AGP नै 9 ते बोडोलैंड पीपल्स फ्रंट BPF नै 10 सीटें पर जित दर्ज कराई ऐ। तोंआई कांग्रेस गी 19- ऑल इंडिया युनाइटेड डेमोक्रेटिक फ्रंट AIUDF ते रायजोर दल गी दो-दो ते TMC गी इक सीट थोई ऐ।

<><><><><><>

T.N. TVK History

तमिलनाडू च नमैं-नमैं सियासत च आए दे फिल्म एक्टर विजय हुंदी पार्टी तमिला वेत्र कज़गम TVK नै अपने गठन दे बाद होए दे पैहले-पैहले चुनाएं च 108 सीटें जितिये इतिहास रची दिता ऐ ते सब्भनैं शा बड्डी पार्टी दे रुपै च उभरिये सामने आई ऐ। 234 सीटें आहली तमिलनाडू विधानसभा च सत्ताधारी द्रविड़ मुनेत्र कड़गम DMK नै 59 सीटें हासल कीतायां न- जिसले के ओहदी मुख् हरीफ पार्टी अखिल भारतीय च अन्ना द्रविड़ मुनेत्र कड़गम नै 47 सीटां जितियां न। होरनैं पार्टियें च पट्टाली मक्कन काची नै 4- कांग्रेस नै 5- बी.जे.पी.- देसिया मुरपोक्कू द्रविड़ कड़गम ते अम्मा मक्कल मुनेत्र कड़गम नै इक-इक सीट पर जित हासल कीती ऐ- जिसलै जे CPI (M)- विदुथ लाई चिरु थाहगल कत्ची ते इंडियन यूनियन मुस्लिम लीग नै दंऊ-दंऊ सीटें पर जित दर्ज कराई ऐ।



PM-WB Gratitude

प्रधानमंत्री नरेन्द्र मोदी होरें भारतीय जनता पार्टी दी जित गी एतिहासिक करार दिंदे होई पच्छिम बंगाल- असम- पुद्दुचेरी- तमिलनाडू ते केरलम दे लोकें ते पार्टी कार्जकर्ताएं दा आभार प्रगट कीता ऐ। कल संजा दिल्ली च बी.जे.पी. मुख्यालय च चुनां नतीजें दे बाद पार्टी कार्जकर्ताएं गी सम्बोधित करदे हई मोदी होरें आखेआ कि 20 कोला मते राज्यें च बी.जे.पी- NDA दियां सरकारां न ते ओहदा इयै कारण ऐ कि BJP दा मंत्र ऐ कि देश दा हर नागरिक भगवान दा रुप ऐ ते पार्टी जनता दी सेवा लेई समर्पत ऐ।

प्रधानमंत्री होरें आखेआ कि BJP दी इस्सै सोच करियें गै देशवासी ओहदे पर भरोसा करा करदे न। उ'नें आखेआ कि देश दी जनता एह मसूसै करदी ऐ कि जित्थै-जित्थै बी BJP दी सरकार ऐ उत्थै अनुशासन बी ऐ ते विकास दी रफ्तार बी। प्रधानमंत्री होरें अगगे आखेआ कि देसै च इक नमें सवेर दा औना होआ ऐ ते जनता नै भारत दे महान लोकतंत्र- कम्म करियें दस्सनें आहली सियासत ते “इक भारत-श्रेष्ठ भारत” दी भावना च अपना भरोसा जताया ऐ।

<><><><><><>

Jaishankar –Jamaica Meeting

विदेशमंत्री डाक्टर एस. जयशंकर होरें जमैका दी अपनी अपनी हमरुतबा कामिना जॉनस स्मिथ ते किश होर कैबिनेट मंत्रिएं कन्नै बैठक लाइयें भारत ते जमैका बशकार सांझ-भ्याली दे बक्ख-बक्ख पैहलुएं दी समीक्षा कीती। इक सोशल मीडिया पोस्ट पर उ'नें दस्सेआ जे इनें बैठकें दौरान शिक्षा- सेहत- राई-बाई- खेड्ढ मनोजरंजन- छमता निर्माण- ढांचागत निर्माण ते होर कैई क्षेत्रें बारे विचार-बटांदरा कीता गया।

<><><><><><>

Iran Strikes Fujairah

ईरान दे ड्रोन हमले मगरा कल फुजेराह तेल उद्योग क्षेत्र च भीषण अगग लगगी गई। पिछले महीने युद्ध विराम लागू होने दे बाद सोआं संयुक्त अरब अमीरात पर एह पैहला हमला ऐ- जेहदे च बड़ा मता नुकतान होआ ऐ। इस हादसे च त्रै भारती नागरिकें गी ममूली चोटां आइयां ते उनें'गी अस्पताल च भर्ती कराया गया ऐ। अबू धाबी च भारती दूतावास नै आखेआ जे प्रभावत लोकें दी सुरक्षा यकीनी करने लेई ओह मकामी

अधिकारियें कन्नै राबते च ऐ। संयुक्त अरब अमीरात दे रक्षा मंत्रालय नै तस्दीक कीती ऐ जे कल मुख्यै बक्खी आवा'रदी 12 बैलिस्टिक मिसाइलें- 4 ड्रोन ते 3 क्रूज मिसाइलें गी रोकी दिता गेआ। युद्ध विराम शुरु होने दे बाद थमां ब्हाई सुरक्षा नै कुल 549 Ballistic मिसाइलें- 29 क्रूज मिसाइलें ते 2 जहार मानवरहित विमानें गी मारी सुट्टेया ऐ।

<><><><><><>

Oil Prices Jump

पिच्छले सत्र च आई दी तेजी दे बाद वैश्विक तेल दी कीमतें च ममूली गिरावट आई ऐ। बाजार- अमरीका ते ईरान बश्कार तनाह दे चलदे आपूर्ति सरबन्धी जोखिमें दा आंकलन करा'रदे न। जुलाई च डिलीवरी लेई Brent कच्चा तेल अज्ज सिफर इशारिया 6 फीसदी घटियै 113 डॉलर ते 77 सेंट प्रति बैरल पुज्जी गया। उत्थै गै West Texas Intermediate कच्चा तेल इक इशारिया 3-5 फीसद थमां घटियै 105 डॉलर ते 6 सेंट प्रति बैरल पर आई गेआ। संभावित आपूर्ति व्यवधानें दे चलदे Brent कच्चा तेल दे तकरीबन 6 फीसद ते WTI दे तकरीबन 4 फीसद बधने दे बाद एह गिरावट कलै दी मजबूत तेजी मगरा आई ऐ।

<><><><><><>

Trump Latest Warnings

अमरीका ते ईरान मझाटै नमी चेतावनियें ते फौजी कारवाइयें दे दावें दे चलदे होर्मुज जल डमरु मध्य च तनाह बदधा जा'करदा ऐ। अमरीका दे राष्ट्रपति डोनाल्ड ट्रम्प होरें चेतावनी दिती ऐ जे जेकर ईरान-अमरीका दे ज्हाजें गी नशाना बनाग ते उसी एहदा

अंजाम भुगतना पौग। उन्दी एह टिप्पणी संयुक्त अरब अमीरात पर ईरान दे हमलें दी खबरें मगरा आई ऐ। वाशिंगटन मूजब अमरीकी सेना नै जलडमरु मध्य च 7 ईरानी किशतियें पर हमला कीता ऐ। अमरीकी केन्द्रीय कमान- सेटकॉम दा आखना ऐ जे जहाजें गी तबाह करने दे अभियान च हैलीकाप्टरें दा इस्तेमाल कीता गेदा ऐ। उआं ईराना नै हूनें तगर इनें दावें पर कोई प्रतिक्रिया नैई दिती ऐ।

<><><><><><>

IPL

IPL च अज्ज संत्रा दिल्ली कैपिटल्स दा मुकाबला चेन्नेई सुपर किंग्स कन्ने होग। मैच साइडे 7 बजे दिल्ली दे अरुण जेटली स्टेडियम च खेडेया जाहग। एहदे शा पैहले कल रातीं मुम्बई दे नावखेडे स्टेडियम च खेड्डे गेदे मैच च मुम्बई इंडियन्स नै लखनऊ सुपर जायंट्स गी 6 विकेटें कन्ने हराई दिता। पैहले बल्लेबाजी करदे होई लखनऊ दी टीम नै 228 रन्ज बनाए- जेहदे परते च मुम्बई दी टीम 18 ओवर ते 4 गेंदे च 4 विकेटां मोहाइयै लक्ष हासल करी लैता। रयान रिकेल्टन गी मैच दा बेहतरीन खडारी घोषत कीता गेआ। इस जित दे कन्ने गै मुम्बई इंडियन्स अंक तालिका च 6में नम्बरै पर पुज्जी गई ऐ- जेहदे नै टूर्नामैन्ट च अगड़े बधदे दियां मेदां अजे बी बरकरार न- अजें कि लखनऊ सुपर जायंट्स 9 मैच खेडने दे बावजूद छड़े 4 अंक गै हासल करी सकी दी ऐ ते ओहदे प्ले ऑफ दी ट्राई शा बाहर होने दी नौबत आई चुकी दी ऐ।

<><><><><><>